

Samoa ma le ma'i o malo: O le tauiviga mo le faatumauiina o le temokarasi a Samoa

E le o toe po se lilo i le tulaga o loo ta'oto ai upufai o le malo Tuto'atasi o Samoa, ma e le toe tau auauina, ua faafofoga Samoa ma le lalolagi. E iai ona fa'aaoga le upu, o le ma'i. O le ma'i o malo; ta'u foi e nisi o le gasegase i le gagana afeifei; e foliga o se ma'i o se tamalii o loo talosia ma tapua'ia, o iai pea le faamoemoe e toe faafo'isia lona malosi. E le o se gasegase o se toeaina e faapea ua siliga se fofo ma ua sauni e alu, a o se ma'i lenei o se tamalii i le taulotoaiga o lona malosi, 58 tausaga, ua mafua lona ma'i i le feeseesea'i o lona 'auaiga. O le fe'ese'esea'iga e mafua i le mataupu poo ai o le a filifilia e faia upu o le aiga. E agaia le nofo, ma tautua le aiga i le va i fafo.

E foliga mai ua tigaina le ma'i ona o le leai o se 'autasiga. Ua saili foi i taulasea o le fanua se tali, ua saili atu foi i fafo i nisi o iai le poto faapitoa i aga o taupulega faa-malo ma tulafono. Ua saili i le lagi le Silisili Ese ma le 'aupai, ua saili ifo i totonu i lotofuatiaifo o tagata ta'ito'atasi uma. E foliga ua leai se vaipanoa e le'i asia i lenei sailiga i le mea tonu, ua fa'aaoga ai e itu e lua soo se auala ma meafaigaluega e faatino ai le finauga. E filemu nisi auala, e faaleagaga nisi, malosi foi le faalelalolagi, e faumalo ai auala masani faaletagata - le tautuu'a'i ma le taufaaleaga. Mafua ai le upu o polotiki palapala, poo polotiki osofa'i i le tusi a le alii Niu Sila o Nicky Hager, ua oona ai le 'ea. O le vanu lea e savali ai ma le faaeteete, e le i moge o lagona a o le poto ma le faautauta, ma le alofa. Ua tofotofoina foi le tagata faasoa pe faasoa, ina ne'i faitauina sese lana e faasoa, aemaise i lenei taimi o le malosi o le faaitu'au. Peita'i ua malo le lagona e le tatau ona taofia se naunauga e fia auai i lenei faasoa taua.

E le o se ma'i muamua lenei o Samoa, e tele isi ona ma'i na toe e fano ai. Toe tepa i tua i lona tala faasolo, i faigamalo a e na faumalo i le tofi o Samoa; e iai Tala'aifei o Toga, na aliali ai i luga suafa - Tuna, Fata, Ulumasui ma isi, i le tala

o Samoa. Le tula’i mai o Nafanua ma faapea ona toe faafo’isia le malosi i le gasegase malo o le toeaina o Ta’i’i, sau a’i toe faata’otolia i taimi o pulega faakolone. Sa manatu o ni foma’i lelei Siamani ma Niu Sila, ae leai, o i laua lava sa fai ma faainumia le ma’i i vailaau sese, ma faapea ona saga tigaina ai. Ae ‘aua ne’i galo foi, sa mafua nisi ma’i ona o le lotoa o le ma’i lava ia ma le tausili i le pule aoao.

Faato’ā maua le mapu ina ua o ese foma’i mai fafo, ua tuto’atasi ma faapea ona toe afua ai se taeao lagilelei. Ua ‘autasi le aiga e fai se faavae (tautoga) e taumau i ai, ma taofiofi ai le aitu o mala sa avea ma fetuu i le nofo lelei o le ‘auala. Ina ua toe faata’otolia Samoa i apulu o tofaga i vaitausaga 80, sa manatu lava o le a le mafai e le faavae ma le tulafono ona talitalia le malosi o lu’itau fou, fafati mai faagalua fatio’o; ae na mafai lava. I lena mafai e leai se toto na masa’a, tainane o le maumau na tula’i mai ona o tapu ua oia, ina ua fesolia’i le va o le pule ma le tautua, le va o aiga ma latou tama, tama ma o latou aiga. O le maumau lava lea auā le atunuu atoa e faavae ana faiga ma aga i le ava fatafata. Ui i lea, e tasi le faafitiga, pe faapea foi o se lesona aogā na maua mai ai, o lenei, e mafai e le tulafono faavae ona taofiofi i’umaea i le nofo filemu o Samoa.

I le louā o iai nei, o loo mau pea le toovae ona o le faamalumu ifo o le pule a le faavae ma le tulafono. Pe faapea foi, le Atua ua faavae ai le malo i ana pulega ma tulafono. I upu o lana tagavai, Faavae i le Atua Samoa, ua lava lea e si’i faamati’eti’e ai le pule aoao a le faavae ma lona sini maualuga i le tausiga o le filemu. Ona lagolago atu lea le aganuu ma le lotu, e tusa ona faailoa e le faavae, ma faapea ona maua ai e Samoa se malo e mafuli i le to’amalie i le tele o taimi.

A talanoa iā Samoa ma le pule, e tolu mea e mata’itū, i se taofi o le faifaasoa. Muamua, le mea o loo ofaga ai, lua, le mea e iloa ai, tolu, o lona moliga, poo le fesili pe faapefea lona faataunuuga. Ou te fia talanoa i nei vaega e tolu e faalautele ai so’u taofi.

Muamua, o le pule ma lona uiga. E lagolagoina e lenei faasoa le mau i le pule o se mea e afua mai i sootaga ma fāiā faaletagata. Ana leai sootaga ma fāiā e leai se pule. E le mavavaea le pule ma le poto, e tusa i tofamanino tau lenei mataupu. Vaega 1, e iloa le pule i le mea e nofo ai. Fai mai se pese lausilafia, ua tofia e le Atua Samoa ina ia pulea e matai. O le uiga o lea mau, e nofo le pule i matai o aiga ma nuu; o lona uiga na o se vaega o tagata poo le atunuu. E mafua ai le finau a nisi e moni e pule tagata e ala i le palota, a o le pule moni lava o loo umia e matai i totonu o aiga, faiganuu ma le palemene. Ae taofi lenei su'esu'ega, e fesaua'i ma feuluulua'i le pule; e le faasino le pule i le na o matai, a o se tofi o tagata uma lava, i ona vaega ma vaevaega eseese, faalapopotoga ma taupulega. E pule le tautua e pule foi le pule; i le pule a le tautua e mafai ai ona pule le pule. Pe faapea foi, e fetautuaa'i vaega, o le tasi i le isi. E oo lava i le pule e tautua. E au i le tauola e au foi i le fagota. Afai la o se aiga, o lona uiga e le mavavaea le pule tainane eseese tofiga. O lona pule o loo afifi ma teumalu i fāiā ma gafa faaleaiga, faalenuu, faaleatunuu. I nisi upu, a saili le mea o nofo ai le pule e maua i na fāiā o loo fusifusia Samoa o se nuu maopoopo. O na fāiā e tausi i tapu o tofiga ma feagaiga ma le va fealoaloa'i.

Talu ai la le fesaua'i o le pule, e le faigofie ai ona faatulaga ona vao tua'oi. O le pule a le matai i le fono a le nuu e iloa foi i le lotu i lona tofi tiakono, e iloa foi i le palemene i lona tofi faipule. E iloa i le aiga o lona tina ma lona tamā ma lona to'alua ma lona gafa fesaua'i tauilelagi. A talanoa mai la le Faamasinoga i le pule a le tulafono, e le faigofie ona vaea falaooto e nisi, poo le fea le tua'oi o le pule faamatai ma le aganuu, poo le lotu foi, poo lona tamaliiaga, mai le pule o loo aumaia le poloaiga. O se popolega malosi lea mo se tasi o matai sa faatalanoaina i le su'esu'ega, o le le manino o le to'atele i le uiga o le ola i lalo o le tulafono.

E faapefea ona gaua'ia se matai taua poo se tulatoa na te talia lea pule? O le tali, e le i le malosi o le tulafono a o le manatu o sea matai i le ta'uleleia ma le va fealoaloa'i i le matau mai a isi. E mafai ona faataunuu le pule a le tulafono,

i le pu'eina ma saisaia se tagata noa ma le le taualoa, ae a tuu ane loa i ta'ita'i o le malo, le lotu ma le atunuu, e atupopo'e le taofi. Poo fea e iai le tuaoi o le faatino e 'aunoa se fefe poo se faaitu'au' ma tapu faaleaganuu e leoleoina ai ana ta'ita'i.

Lona lua, o le mea e iloa ai le pule. Mo Samoa e mautinoa e iloa le pule i le ua ave i ai le faamamaluga a le aiga e ala i le suafa matai, se itumalo e ala i se suafa maualuga. I faigamalo faaonaponei, ua iloa le pule i le tofi faipule, minisita poo le palemia foi. I le lotu ua amana'ia foi se tasi i se tofiga taualoa. O i latou na e faitaulia i faalupega, a o le to'atele e faaleiloga ma lilo ifo i le manatu ma le vaai, ma faapea ona lamatia gofie ai a latou aia tatau ona o le tulaga vaivai i le fesaga'iga ma e taualoa ma malolosi. Ua latou talia foi lo latou tofi o ni e tautua, aemaise foi o le manatu e le ese i latou o topule, o ni aiga lava poo ni uo foi. A o vevesi malo i fafo ona o le faumalo a le pule, a o loo to'a pea le tai mo Samoa ona o lea mau, e le ese latou nā ese tatou iinei. Ui lava ina fefulitua'i i nisi taimi, a o Samoa lava o se aiga. Auā e tala tuu mai faiga faavae ma tulafono i le tau faatonutonuina o lagona si'isi'i e mafua i le tausiga o mamalu ma tamaliiaga. E mafua ai ona puipuia le ao o le malo i tapu e faasao ai i ni ta'uleaga i lalo o le faavae. E faapena foi tapu e malu ma mamalu ai e ua totofi i tulaga ta'ita'i, nuu, malo atoa ma le lotu.

I le faaofia o le tulafono faavae, ua faamauina ai se 'autasiga fou, e leai se tasi lava, i sona tulaga taualoaina, e sili a'e lana pule i le tulafono faavae. E le o se tulafono fou lea, sa soifua mai ai foi Samoa anamua, e oo i le nofo poo se tamalii iloga e le sili a'e ia i le pule a alii ma faipule o se nuu, se itumalo. Vagana sina vaega to'aitiiti na lei pa'ia, ona o le mata'utia o la latou pule poo tapu foi sa leoina ai. Ui lava i lea, e mamafi aga a le malo Samoa ona o teuga ma tifiga a le faamatai ma le aganuu. Ona o tapu faaleaganuu o loo faamamaluina ai. E leai foi se malo e aunoa ma le lotu, auā o le Atua ua faavae ai Samoa. O ni tapu uma nei o loo ua tu ai luga le malo, afifi i le fatu o lona Faavae. O le malu foi lea ma le lagotonu e puipui ai tagata Samoa uma.

Ma lona tolu, o le moliga o le pule. E tula’i mai ua ave le faatuatua a Samoa i le ata faatemokarasi. E iai ona tula’i mai le fefa’atauagai a pule e tolu i le Faatonu, Faamasinoga ma le Palemene. Ua malamalama lena fāiā faatafatolu, e lē feaiaa’i pule, o le tasi e faia tulafono, o le isi e faamatala ma faasala i latou e solia, ma le isi e faataunuuina. O le ata matagofie lea o le temokarasi e taulagia. O le ata o mea moni e le faapena. I le tele o temokarasi a le lalolagi, e tofua le malo ma lana fausaga. E malolosi nisi (lelei mo tagata) ae vaivai nisi (leaga mo tagata). E mafai e le palemene ona fai se tulafono lelei ae a le faia le tiute o le malo e faataunuu, o se maumau lea. E faapena foi mo le Faamasinoga, e mafai ona molia le poloa’iga i le pule malosia ua faamauiina ai, ae a le faia le tiute o le Pule Faatonu e ala i matagaluega e pei o Leoleo, poo nisi foi matagaluega, e maumau foi.

O se mea faigata ua tula’i mai, ona ua fetoa’i le faamasino tulafono ma lē e molia lana poloaiga. I tulaga faapenei, e tasi le filifiliga mo nisi, o le saili i le malosia ma le pule a ‘a’u’pega o taua. E molimau lipoti o TV i lea auala, i ma’i o malo i atunuu o le lalolagi ua fano ai ola e tele. O se auala mai anamua lena. Ua uma ona laasia e Samoa lea auala, e leai sona taunuuga fiafia. E le tauilo le matega e le o se lagona lea o le atunuu i ona tupu ma e’e, ta’ita’i o ekalesia ma nuu. Ua ao Samoa, tainane misa i upu ma tala ae leai se tasi na te toe faaleaga sona uso poo se aiga e ala i ni sauaga, tusa poo fea e gata mai ai le ‘ino’ino. Ua toe nei o se aga atoa le 60 tausaga o le folauga a Samoa tuto’atasi, a o loo sologa manuia pea tainane tofotofoga, ua iloa foi sona mafaia e tali atu i peau lagavale faafuase’i.

O le tali i le fesili poo le fea itu e sa’o a o fea le itu e sesē o le mea lea a le Faamasinoga. Pau lea, e le o manino 100 pasene se tali, fai mai le faamasinoga apili e iai le avanoa mo le 6 sui e faamatala ai le le atoa o le 10 pasene, ae sa taumau le faamasinoga maualuga i le 5. O loo tālia iuga o tagi e afua i le palota ma e le o mailoa se faatulagaga e tula’i mai i le iuga. Ui e foliga ua falala i le FAST le faitau, e fua i iuga o faamasinoga ua mae’a, ae e le o maua ai le manino 100 selau pasene. Ma lena, ua faapea mai le

Faamasinoga, a le usita'ia le poloa'iga o le 7 aso, ona toe suia lea lana faaiuga e lagolagoina ai le alagatau o le sauniga sa faia i fafo o le malaefono i Ti'afau. I nei uma faaiuga, ua na o le Faamasinoga o loo sili ona malamalama i ana faaiuga. Talu ai le mau eseese o vaega e lua i faapupulaga o faaiuga, o le uiga lea o le taofi i le le manino. Fai mai le HRPP e maua le manino pe a se'i atoa le auvaa ona usufono lea Samoa. O le tali a le FAST, ua latou taulimaina le numera e faavae ai le malo. O le lave tuga, e le o lagolagoina lenei e le Ao o le Malo, o ia e taloina le fonu. I le tulaga ua tula'i mai ai lenei fetoa'iga, e foliga o se uepa ua faigata ona talatala lona lavelave.

E mafai ona faatino le pule a le faamasinoga auā o lana o le mea amiotonu, ui lava i ni maumau e ono taugatā se totogi mo Samoa ma lana osiosiga o fāiā e mamalu ai ana pulega ma saogalemu ai ona tagata. I le vevesi o loo tula'i mai, e peisea'i o loo nofoilo le Faamasinoga i lea foi vaega taua; pe a faitau toto'a i ana faaiuga. O se faailoga lelei lea mo se faamasinoga i so'u taofi. E le o le tulafono mo le tulafono a o le tulafono e saili le amiotonu i soo se auala e faamua ai le filemu. E fetui lea ma le si'osi'omaga. O se tasi o malosiga o le FAST ma le itu o agaia le malo tauti, o le lava papale ma le onosa'i. Talitonu foi lenei faasoā o le tali lea i le itula o loo sili le moomia. O le popolega, o le tausiga o mamalu ma le ta'uleleia. O se mea faigata mo le Faamasinoga pe afai e le tuā ana poloaiga e fai. O le a avea ma se mea e faamamasagia ai lana pule, atoa le amana'ia i le vaai a tagata, ae faapea foi le lalolagi o loo tilotilo mai.

E tele faata'ita'iga o mataupu ua uma ona fai i ai ni iuga a le faamasinoga, a o loo tālia pea lo latou faataunuuina e leoleo ma isi e ana le tiute. E le faigata ona tauilo ni mafua'aga; auā o nisi mataupu e maaleale. Ona ta'oto ai lava lea faapea se'ia toe lalaga a'e e nisi tupulaga ma fa'aauau ai pea ni eseese. E tele ni maumau tula'i mai, aemaise mo aiga e ana tagi, e le gata i tupe a o mamalu e foliga ua faatasina ona o le le mafai faataunuu o iuga faamauiina faaletulafono.

Upu moni o se vasa fou lenei e lei asaina muamua. O se itulau fou i lona tala le toloi faaumiumi o se tauaofiaga a se palemene ina ua tuana'i se faiga palota. Ae le fou i isi temokarasi a le lalolagi, e aofia ai i latou matutua. Lata mai nei Isaraelu, faatali le atunuu a o alo atu pati e tausaili se malo; i tua atu Aielani i lana faigapalota ia Fepuari 2020, e 4 masina o faatali le atunuu. Pei lava sa tupu faatolu ia Niu Sila, lata mai mo se 3 masina, a o feutaga'i le NZ First ma isi pati e saili se 'autasiga. I Peleseuma i le 2010, e 541 aso o faatali le atunuu a o fai feutaga'iga i le va o vaega faaupufai. I Siamani i le 2018, e atoa le 4 masina. E ui e eseese aga o finauga, poo faavae faaletulafono e afua ai, a o le uiga o le taofi, e le faigofie ona faasoa le pule pe tuu ese atu foi, e mafua ai ona faaumiumi. O ni aga ia o faiga faatemokarasi e ala i pati faaupufai. Ua ta'ua e le 'aufaitofa, o se aga ua avea o se masani, ma e le uma le tupu pea i le aga i luma mo pulega malo temokarasi.

Ua ta'ua le malo o Isaraelu, e faalima ni faiga palota sa fai i totonu o le lua tausaga, e ta'u mai ai ni mea se lua. Muamua, o loo ola ma manava leotele le temokarasi a lea malo; lua, a tupu so'o sea tulaga (talo soo ni faiga palota), e au ina pa'u ai se faigamalo malosi. (O tagatanuu e naunau i faigamalo e maua ai le to'afilemu ae le o se lotoifale vevesi). O lea ua faamaonia i le faia'ina o le Likud ma le alii sa palemia, Netanyahu. Benjamin Netanyahu, e iloga i upufai a lea malo, o le palemia pito umi ma tele ana nofoaiga ona o lona ata o se ta'ita'i faatuatuaina i le puipuia o Isaraelu mai ona fili. Ae i le iuga o le aso, ua fai e vaega faaupufai le iuga mo lea atunuu. I le mataupu a Aielani, ua tupu le mea e lei tupu, o se malo soofaatasi, ona ua toe pau lea o le filifiliga.

O le pule a se faigamalo tausimea o se tasi lea mataupu laualuga i faasoa a le aufaitofa i lenei taimi, muamua o le malosi o lana pule e gaoioi ai a o tãlia se iuga. E aofia i lena le fesili pe aia pea sui minisita ua leiloloa o latou nofoa i le palota i tonu fai o le malo tausimea. Ou te le mautinoa se tali o le fesili, e le o manino mai foi i totonu o upu o le faavae o Samoa se faasinomaga o le mataupu, mo a'u lava. I le mataupu a Aielani i le tausaga talu ai, e tolu minisita a le malo na leiloloa o latou nofoa, ae talu ai o i latou o se vaega o le

kapeneta, o lea sa fa'aauau ai pea la latou pitolaau, tainane le tulaga ua iai, aemaise o le vaai a tagata ma le temokarasi i aga masani. E foliga mai i le tele o mataupu faapea, faato'ā faamatuu atu lava le pule pe a maua se malo. I le taimi nei, o loo faalagolago Samoa i se faamatalaga faaletulafono mai le malo Niu Sila na lotolotoi i tapenaga o lona Faavae ma tulafono.

Tatou te puipui uma ia tatou pulega e tolu, auā ua tatou iloa ona pau lea o le auala e malu ai mai le pule faito'atasi a se vaega. Ona pau lea o le faiga e maua ai ni faiganuu fiafia ma sa'oloto, pe a maua le paleni. Fai mai ua faailoga le 100 tausaga o le malo Komunisi aupito malosi i le lalolagi, a o loo sauaina tagata o Hong Kong ona o pulega a se vaega faaupufai e le fiafia i ni faitioga, ma molia ai lana pule i sauaga ma le taufaafefe. Lipotia foi sauaga i lotu Kerisiano ma isi, ona o le feteena'i ma talitonuga faa-Komunisi.

Tuufaafeagai lea ma le ata o le temokarasi toeaina, ia Amerika. Amerika e aupito matua i le lalolagi (taatia Eleni ma isi o le lalolagi tuai), ua aulia lona 233 tausaga. A o ai na manatu e toe foi Amerika i se maulalo e pei o lea na tula'i mai i le nofoaiga a Trump, ina ua osofa'i e ni ona so'o le maota fono o le atunuu? A faatusatusa ma Samoa, o loo talavou pea lana temokarasi, upu moni o le a aogā mea ua tutupu i le taosoina o lana folauga i luma. E moni le upu, o le tofogi o le sa'olotoga, o le mataala e tau i le iuga.

Tatou te taunapa foi ia tatou tu ma aganuu fa'aaloalo, auā o le tasi lea malosi'aga o le taula o le vaa o Samoa, i lana tofa saili, faautaga loloto ma le ava fatafata, e tatau ona taofi pea i ai auā le folauga umi. O nisi taimi ua sola le tofa ona o tofotofoga ma tupe, ae o loo mau pea le taula ona o pelega o le nuu moni poo le Atua foi. E pei ona malie i nisi a tatou upu o le poto, e le o le manu a o le galu tatou te afaina uma ai; e le o le lauamanu a o le faamuli o atu e tulimata'i; 'aua ona 'apo le pola motu i tua i upu soona lafo ma le taufaaleaga; e le o i'a a o le upega, a masaesae e le faigofie ona toe fonofono. O manumanuga faatagatanuu moni e le tauilo, auā e mamae le tava'e i ona fulu.

Mo Samoa, e lua filifiliga. O lena ua faatu mai e le HRPP ma lona ta'ita'i. O le filifiliga e faatali ai le usuia o le fono se'ia mae'a uma faamasinoga. O le finau lena a le HRPP. Afai e taunuu lea mana'o e aunoa se faalavelaveina, atonu o le iuga ma le taunuuga lena o le tauiviga. O le itula foi lena e faato'ā maua ai le tonu, ma iloa tonu ai poo le fea vaega e faamanuiaina. Lua, o lena ua faatu mai e le faamasinoga maualuga, e usu le fono i le fitu aso. Afai ae le usita'ia e i latou o loo aafia ai, ona molia lea i le fuao o le pule a le faamasinoga. I le filifiliga muamua, e mautinoa o le a saga ta'umaulaloina ai le Faamasinoga, ae faasao ai le malo tausii mai se lagona faigata o le tula'i ese faaleiloga. I le filifiliga lona lua, o le a faamaupu'epu'e ai le pule a le faamasinoga, ae maua e le HRPP le pale o le ta'uleleia i le faaeaea i le pule a le faamasinoga. Pe faapea foi, i le lotomaulalo. O ni filifiliga faigata uma nei ona o mamalu ma tamaliiaga tausisia.

I le iuga, e le lua ni vaa, e tasi a le vaa o loo tatou folau uma ai, pe nonofo ese pe taumamao nisi, o loo iai lava i luga o le vaatele i le agaga, auā o le aiga Samoa o le tofi e le mavavaea auā aiga, faasinomaga ma gafa. Ui e foliga ua lua kapeteni, ae o loo finau lava i ala o mea. O aga ia a nuu malamalama ma faasoa faatemokarasi. Talu ai foi o Samoa o se atunuu e faatuatua i le Atua e tali mai, o le lagona foi lea; pe umi pe vave se fofo o le gasegase o Samoa, ae mautinoa e toe faafoisia lona malosi. Pei lava o ona mau gasegase sa faapea e fano ai, ae toe tula'i mai lava.

Mulia'i, o le upu a tautai pe a lualuta le vasa, lafoa'i utavale ae piama le fua. O se fautuaga sili lona logomalie mo lena itula o le taimi. O a mea e lafoa'i, a o a mea e faasao? E faigata ona lafoa'i mamalu ma ta'uleleia. Ae e iai ituaso e le ma'alofia ai, e le pine o ni maumau na e mafai ona toe tauia mai i se aso, pe a lē i lena olaga, a o le olaga a sau i luma o le FAAMASINO SILI.